



蓋

身貴爲刊身

830963

鶴田先生少輒以詩賦名後乃專治易在歸安學舍十四  
年治易益精道光辛卯應



書館藏  
卷之四

召入都人皆爲先生賀先生不色喜閉門注易如在學舍  
時所撰周易指將蕺稿苦乏剗劂資然雅不乞人伙助初  
先生官歸安時以省墓旋括至瑞安先仲兄咸呈所業先  
生閱之甚契賞因妻以長息每易指一卷成輒郵寄仲兄  
俾叅校焉無何仲兄捐館先生哭之嘔血故易指言咸无  
隱致痛語小注又有咸速死今亡矣夫子咸思顏氏子也  
盖亦有感而云然仲寡嫂謀以應折之家貲爲刊易指費  
求不泯仲兄校訂名家君與先生特首肯之故先仲兄得  
附名于卷尾先生嘗曰吾三十年心力在此今書成雖三  
公不易也卽乞長假歸之瑞安遂定居焉既復手哀易指  
底稿特返舊廬函石藏之大鶴山乾乙峯下賦詩以紀而  
先生遂歸道山矣迺世之讀先生詩者每以不得先生詩  
全集爲憾家君從其家求得先生手寫太鶴山人詩集凡  
十有三冊塗乙幾不可辨識命坤校以付梓竊念周易指  
脩辭變象占與義難測詩則道性情開卷涵泳似易領畧  
且出先生手訂次第秩如誠不可不傳之同好俾先睹爲



快與 總世兄謄寫一過仍釐爲十三卷起四卦岩卽  
太鶴山混元峯終太鶴山易塚計得古今體詩共一千二  
百四十四首篇次一如先生手訂不敢少紊雖外間傳誦  
有喇嘛行等篇亦不敢屏入另錄爲一冊俟通于詩者重  
刪補焉先生生劉文成公故里得徧觀盡識文成之學嘗  
謂有明詩家以青田集爲冠此特文成緒餘耳先生既治  
易于詩亦罕作似亦以詩爲緒餘而世人僅以詩人目先  
生者殊未足以知先生也先仲兄校周易頗精審今 坤校  
先生詩集懼少舛謬無以副嚴命之萬一不禁感念亡兄

二

淚潄潄潛下也 昔道光二十年四月瑞安受業洪坤謹識

初序

青田多佳山水余所至者惟石門洞舊傳劉文成讀書處洞以瀑布爲勝峭壁鏡天巖扉中斷天紳下垂隨風曳練蕩漾空際非烟非霧瞥然而下如雷霆之震賦奔崖裂石及其既過則飛流灑雪如玉龍之飲于澗陰陽變幻莫可端倪余喟然嘆曰此天下之奇觀也乃今於子彝之詩遇之子彝生文成之鄉昔爲諸生至杭州余賞其詩時儀徵阮公芸臺方爲學使亦盛稱子彝自是子彝遂以詩名無何舉于鄉數年來余宦遊南北子彝屢困禮部之試久不

序

相聞今年春余在京師而子彝復以試事至報罷旣得縣令子彝辭之一日者持其太鶴山館初稿丐余序則子彝十數年之詩悉萃於是子彝性情澄澹而奇逸適與其地之山水相肖而詩之孤峭絕特一如登懸崖攀絕巘聽猿鳥之夜啼而睹銀潢之下墜也石門古稱奧區祇以僻在括蒼游其地者蓋少然世固無不知有石門者子彝貌甚癯而精悍之色常露眉宇其詩激壯之處劇似文成集中作雖伏處隱約嘗爲鉅公所識今之人旣皆知有子彝矣欲詩之無傳于世也得乎



嘉慶十三年孟冬月無錫秦瀛序



太鶴山人集

青田端木國瑚鶴田

詩卷一

四卦巖卽混元峯

巖在太鶴山頂高十餘仗  
中直橫剖之成四象故名

混元一塊石卦畫列文章剖判巖峯下生成鶴峒旁風雲  
閒卷握天地細包囊分應少微野東南古括蒼

撫松石旁老松

谿粒雲藏鼠巖枝月墜猿涼濤常沸頂怪石忽生根布夏  
金壇冷分冬玉洞暗餐脂受方法息影練精魂

卷一

調鶴詞

松下響流泉松上響迴風清琴一以弄白鶴下曾空曾空  
青如烟鶴舞何翩翩更將幽澗曲彈入廣庭絃須臾琴聲  
靜素羽頓已整一片蒼苔上都是白雲影白雲深復深  
漻漻滄海心翹頂不能去愛君松下琴

記颶風

嘉慶丙辰元仲秋月初朔日夕天崢嶸箕曜奮芒角樹頭  
烏暗驚子母聞膈膊啾啾夜變陰月黑叫鶻鶴鬼車羣復  
遊下向屋頭啄人家呼雞雛小兒入纏橐閉門滅火臥重



重掩閨閣夜半天刁刁鏗鏘碎檐甍大噫東北來形氣莽  
叅錯千家怖一聲高翼萬虎搏檐瓦發驟空排內裂帷幙  
壁電橫搜人狂弩射飛雹圍木拔地起半空相枝攫雨水  
闔扇流魚鼈屋梁落人鬼亂支撐仆地鬪齒齧一家不相  
呼惶惶念老弱此時誰計生計生亦索莫屋居半泥塗田  
園盡砂礫匍匐不暇啼面面相貽睥肢體綴一身且自拾  
椽桷骨月完在眼漸復求藜藿山城未見經亦未聞在昨  
鄰舍販温州竄歸創兩膊苦說温州夜風雨更狂虐謂風  
有衝道其力自相迫當道衝車旬餘怒礮石惡高塘洞重  
圍殿屋發到脚碑石忽斷頭蟲屬遭剝枯體血燐飛破  
碎倒棺槨檣航拉枯薺洵洵粉鯁壑江潮擁入城城根兀  
且卻時聞海壇山窺見江爍爍有物鬪江中駢頭角山嶽  
撒揭裂天開火珠赤烟爍雲壞駭西崩掀勢狀追捉一時  
礮礮光萬戶恣輾轢有何一將軍建牙動城郭瞋目叱鱷  
魚不足當炮烙般地折纛旗兵欄卷飛籜矢據蒼頭中精  
銳猛銷鏃平旦躍馬去不睨溝蚋螻長官睢且吁連日如  
中瘡簿篋自料理解舍自塗墜和帖吏下鄉雞豚早摸索  
露地無屋椽塞耳是民瘼余聞良可嗟此事非冥漠春正

月初一天腥野凍澗嚴霜殺麥苗山民食已薄今秋地方  
殘非但無揪穫此咎定何致諒是官吏蠹吾

皇首紀元殊恩被胎鷓五事甚修紀朝位布清恪當有和  
風雨廣使民生樂甌括一隘區嚮隅已苦數吾聞黃帝時  
大風乃可繳鑿齒與窳窳一時皆擒剖吹垢相風后天下  
自清廓

皇今道是天手自司橐籥山川風雨師容何逢不若水日  
有堯湯桑穀在殷亳災傷古非傷聽卑天人格陰陽衆災  
異勿令諫牘削吾願貢此詞庶代一士諤

石門

卷一

三

誰鑿石壁開巨靈狀可假誰挽天河水飛奔裂崖下急雷  
常彌冬飛雪不辭夏草木無寒暑積翠巖岩罅日月遊其  
顛陰陽變尤乍猿啼孤竹裂鳥散冥花謝靈心探幽怪塵  
殼當風化飄然騎白龍下視滄海大

括蒼山雨

天人括蒼天欲低翠微直上雲與齊盤空觸破雲中壁萬  
丈芙蓉散馬蹄軒皇仙去空烟霧靈異獨叱真龍護蒼然  
鱗甲不可撓蟄雷震起蟠髯怒勢薄光景寒森森濕氣沍



結千林素倒吸銀河作雨飛珠璣噴薄光無數陰陽開闔  
盪層冥奇變迨還來仙靈丹氣冲虹鼎火赤劍光躍電鑪  
烟青嵐疎翠密競欲滴高空洗出山容醒忽開霽景數峯  
外丹霞一道凌紫庭行人路出桃源中衣上雨點桃花紅  
足下走雲如走馬撲面爽氣堆青空山靈有意弄奇譎千  
巖一日開鴻濛清光叠叠雨際出不數剗刻誇鬼工百載  
高風揖隱吏烟霞飽眼心如醉長疑此境隔人間誰識仙  
山在平地

宿混元峯

卷一

四

朝尋丹穴午芝宮夕臥深菴環翠中

環翠菴

仙磬堂虛長自

響聖燈林靜忽然紅松根黃狗寒嗥月石窟蒼鷹黑嘯風  
夜半夢驚秋井上白雲一縷起蛟龍

石門劉文成祠

王氣出江東先生道未窮卷書自圯上龍臥此隆中瀑布  
長時白山花寂寞紅我來殊已暮蘿帳響秋風

王郡伯清屏小住圖

青林搖烟寂寂古屋秋光滿岩翠流如瀑仙都舊隱偶此  
卜築彈琴一張讀書一幅鬚眉更青日飲山滌寫歸括蒼

攬不盈握荔枝峯香墨淡水木如有幽人窈窕在目眷我  
素心足音空谷

廣明堂

碧樹排簷合紅泉漱澗鳴地幽從蘚積谿靜看雲生茶子  
響銅鬲柚花香石枰當年太岳叟

陳太岳  
名中州

服道此遺榮

山後菴

凌雲古刹碧巒峴徑絕人孤夜氣霞汲水巖前晴轉炬讀  
書牕下面如盤花飛陽岫三春暗霰積陰林六月寒不是  
經行僧律苦長年那耐石蒲團

卷一

五

油竹朱陳村戲作示內

家徒壁立舊成都也作朱陳嫁娶圖倉粟早曾空白帝聘  
錢還復欠黃姑長身鸛雀嫌穿碧消食檳榔怕嚼朱莫怪  
同時壓針線人誇夫婿上頭殊

孟家擇對事全非笑我傭奴世上稀自給何當嫌馬磨不  
才未肯泣牛衣漫呼婢子求如願堪作夫人待忍饑著手  
文章織毛羽鳳凰真看逐烏飛

姜山秦淮海監酒稅處

鶯花昨夢總飄零一笏姜山似舊青木石流傳多氣韻詞



篇寄託有精靈小勝荒草埋吟屐古代蒼苔出酒瓶

土人掘得

酒瓶邵明府培  
惠作歌紀其事太息藤州人去後年年風月問園丁

### 蘭谿夜泊

朱樓白塔照蘭汀繞郭香帆日窈冥三月烟花三月市半  
江燈火半江星船娘撇笛爭淒切估客攤錢雜醉醒不信  
行人春睡穩竹雞啼覺曉山青

### 江上作

強作干時策揚帆信遠天辭家看昨日閱世飽經年旅酒  
春風斷牕燈夜雨懸幾時江海夢還我草堂眠

## 卷一

## 六

### 夜發富陽至錢塘作

月落富春灘輕舟夜浩漫波濤隨地濶魂夢到家難犀甲  
長江弩羊裘大澤竿英雄從變化笑作故鄉看

### 宋望祭殿二首

艮嶽風烟慘不春西湖花石代經綸歲時廢舉憑中使

西湖

志後只遣中宮行禮  
歲時簡畧不可考云陵寢安危倚敵人鄧禹入關空想像

張巡哭廟久酸辛棲霞嶺上秋風急莫恨錢王夢有神

無復祠官德祐年湖濬空弔夕陽顛旣分南北無多土縱  
奉春秋已各天露白橫江聞渡雁冬青入地拜啼鵑傷心

莫問中原祭風雨西陵更可憐

江頭觀潮

潮頭虎嘯風滿江潮尾龍走雲逢逢竭來天地事何怪到此英雄心自降千里鼉鼉各徙穴四山谿谷皆奔瀧弄潮小兒不足道漚鳥沙頭還幾雙

游龍井觀董文敏臨米書龍井記石刻

朝辭西子棹獨挈謝公屐龍泓緬澄虛鷺嶺背媿嬾竹露寒林扉蘿風散絺綌雲複岩欲陰苔深徑逾窄檻水搖空青廊日漏虛白僧留辨才風客記太虛石

龍井記是秦少游爲辨才作

卷一

七

奇崛顛米書慘澹香光室鴻鶩軼奇姿蟬化眇靈迹邱壑道更親烟霞世無隔清猿叫岩秋白鳥矯波夕林鐘空際流湖色遠峯碧

西湖竹枝詞

西湖女兒玉不如燒香人道紅芙蓉低聲學念彌陀佛願我郎家會讀書

明月湖頭背月陰與郎羅帶結同心生憎一縷菱花蒂牽著秋波種不深

一門東風一日長東風吹老嫁衣裳南高峯雲北峯雨教



儂朝暮費商量

自從郎去儉梳妝日日采蓮湖內塘怪底蓮心如妾苦秋風香冷在空房

放鶴亭邊風雪清如何相耐到三更勸郎莫被孤山誤只愛梅花過一生

湖上衣裳總想雲春風買盡笑聲聞年年好看花神廟不施花神一錦帽

貧家燕子自相猜門外春風看幾回一度棠梨一惆悵上墳時節踏青來

卷一

八

蓮娘風貌倚雙蛾靚著情人玉面酡莫上湖心亭子去采蓮舟外是風波

鹿頭並著看芙蓉道看芙蓉却看儂儂在湧金門外住回船相候鳳林鐘

湖岸人家柳帶烟女兒生少步仙仙當門自采雞頭子剝向秋盤肉可憐

不信嫦娥愛獨眠月中人認好因緣自家一面菱花鏡擊出湖心不共圓

西陵松柏斷腸春一道裙腰記不真日暮還家憤蘇小錢

塘多說此鄉親

小橋無停去絕弦六橋未暇惹人憐商量凭著雙羅襪  
過金沙上畫船

古事錢王又岳王清波門路隔錢塘黃妃一堦推難倒占  
向湖頭管夕陽

不信西湖有石尤東風作惡轉船頭斷橋西堍無多路惹  
得楊花滿地愁

蓼蓼城鼓隔重關分付遊船日放閒江上看潮湖看月大  
家同住鳳凰山

卷一

九

門口湖光點佛燈放生池外冷如冰一船早與春波至天  
竺山中飯蓋僧

覓藕尋蓮事事癡阿儂從未惹相思金沙港外秋蓬老青  
子駢頭鷺不窺

新婦磯頭新婦悲野風吹冷髮絲絲誰人看過秦皇帝渡  
海香帆繫纜時

儂在山中愛種茶茶時不戴玉簪花新來一味呼龍井不  
信谿源有葉家

謁龍井秦淮海新祠

觀察秦小  
峴先生建



名山得名十有奇山始吐人去此山空像寫山容古我昔  
遊龍泓獨叩禪堂鼓舊院問潮音寂寞已無主斜陽下竹  
扉晚靄迷花鳥歸去隔林鐘響答湖中櫓近聞祀先生後  
人關棟宇配以辨才師元豐游可數清曉蠟屐來寒泉薦  
芳杜井冷月滿壑岩陰雲在戶謂昔祀四賢當以先生五  
况侔括蒼時余郡稱召父今訪古藤陰鶯花埋秋土昔人  
迹就荒斯堂勤藻斧莫令古苔生寒烟迷秋雨

鶴詠篇上觀察秦小峴先生

仙人下太清種芝香滿閣鸞鳳已成羣遠招青田鶴翩然  
鶴西來羽毛何蕭索處之玉池頭雲水隨所託蘋花晚不  
生葭葉秋更落蒼苔入夢寒白雪憐影薄奇氣鬱青霞瘦  
立驚非昨翹首問仙人敢訂餐霞約丹還玉帳深慨想鑪  
中藥

秦觀察重修敷文書院四十韻

四朝光協帝三古世崇儒大學高鄉國宏文溥海隅南巡  
風遠暢北學化覃敷澗水推才藪緇林擴道區靈輿迴鳳  
嶺文囿集駟虞百尺松成棟千盤石作樞天垂文座迴地  
據筆峯孤鳧藻馳秋海鶯花鏡曉湖星霜資剝蝕日月就

榛蕪椽仄苔侵瓦墻欹竹擁途露移階下甕烟歇座中鑪  
翰墨香留榜經書味入厨錦囊穿白蠹瓊案走元駒開厦  
聞徒廣升堂望轉迂幸逢名世彥得復古時模量秉羣材  
尺經傳衆說郭素心精藻鑒清俸足供需冶並洪鈞轉輪  
將大雅扶宿胸增寶繪霞額飭瓊圖螿密蝸涎隔櫺疎蚌  
節鋪縹緗分架插詩禮合庭趨美富門誰入偃僂鼎可摹  
三千年聖哲十一郡生徒地謁緇帷近時禮先師人傳雅器俱  
主衡思舊席入奠祝生芻新設齊次風山長粟主北斗三能重南豐  
一瓣腴瑯嬛開奧鑰藜火佐膏蘇石鼓千年竝金絲兩壁

卷一

十一

娛郢中人抱玉稷下士吹竽宰我思雕朽顏回待鑄愚瓊  
筵羅琬璧鐵網舉珊瑚大匠材牛梓高崗翽鳳梧應天名  
自宋安定學如胡柱列臺中柏車停坐上蒲觀察將以卓異入都旋權  
臬事復留爨桐知最早罄竹頌非誣已連年應紀丁陽歲未徂  
墨徽才合度丹牖化重塗豈獨興民秀真堪贊帝謨寶章  
虹萃彩靈典日增符偉矣隆閩洛休哉慶越吳

湖山春社

樓臺上巳辰簫鼓裏湖春畫舫荷爲蓋香車杏作塵青錢  
看鶴子紅袖比花神多少欄干繞遲來錯惱隣



欄干春景長流水映垂楊花片風隨屣蟲絲日轉廚茶檣  
三月熟酒幔一湖香待看紅鏡出羅衣奈夕涼

天上無金谷人間有玉津微之讓州宅蘇小說鄉親賣畫  
枝雙管彈棊角一巾西冷木居士出飲已經旬

余讀書西  
冷人呼木

相公

殢舞雲猶在催詩雨更忙柳眠無噩夢花浴有溫湯月殿  
丹砂杵風颺白玉牀黃昏相望冷愁煞水仙王

蘭亭秋禊陪閣學阮芸臺夫子

山以貌奇俗乃雜迹奇而不露於道大適駕言蘭亭蕭然

卷一

七

巾幘漸入始佳驟領無獲野痕烟青雲影水白魚唼橋陰  
蟬噪林隙有悅卽取遇勝非擇曲水流今惠風送昔俯仰  
右軍千載主客香聞羽杯味存苔席晞元授簡企川脫寫  
物邁皆新時遞易惜重感斯文請著素石

安瀾園紀勝

西巖桂樹秋綠暗雲藏塢花晴石苔香夜滴枝上雨

天香  
臨

二

天青吐妙香水玉戛疎韻秋館有此君主何須問

筠香  
館

三

貯月水澄鮮留風竹瀟洒此景付閒人不用一錢買

清風皎月

四

客衣颯以輕池面涼已積浴鳥上闌干水波搖寒碧

竹深荷淨

五

風月據一區咫尺渺烟水我亦人中鷗江湖到處是

烟波風月

六

叢碧下寒篠磯斜不復整日光照苔深魚數石上影

磯石

七

花深不藏閣紅闌綠相向俯手拾清芬人坐花枝上

羣芳閣

卷一

三

八

莓苔高於山踏葉不聞響亭中有阮孚一生屐幾兩

翠微亭

海甯觀潮行

吾聞海甯之潮八月十八稱奇觀黃河無有此驚湍大海  
無有此迴瀾又聞潮之奇怪更有此病者睹之氣皆生勇  
者睹之神皆死初七初八潮渟滯十五十六潮旬旬鹽官  
長塘一千里觀者啁嘈亂如蟻白日荒荒臨高臺大江正  
練光褰回須臾兩岸作先勢萬木仆地風聲來黑雲高破  
青天拆海門一線蒼茫白忽起鯨鯢搏翼飛吼空突兀高



千尺赭龕怒過尖山東潮頭壁立排層墉堵墻而進儼臨  
敵隄岸搖動人洶洶雷公擊鼓颺車狂天陣地陣驅低昂  
吳山越山盡破碎萬里西受流沙降吾聞海乃歸墟之區  
無不受何使驚濤駭浪却倒走鴟夷白馬乘之噴薄吐其  
宛祖龍黑鬣鞭之淋漓聞其臭謂天地之呈譎謂江海之  
爭雄胡爲造物兒戲不肯歇神怪力鬪無終窮吁嗟乎媧  
皇塞海燒蘆灰海水倒溢翻爲災神禹已死會稽山九龍  
殉葬遺此患東南地脈天地肺潮穴出入皆從氣心太平  
時百物嘉江海無知作腸胃可知世上捍禦之術皆區區  
聖人治天自有道錢塘之塘鐵幢鐵弩何爲乎噫鐵幢鐵  
弩何爲乎

卷一

木棉花

秋光冷澹雨餘天湖上花開見木棉蟋蟀影依紅露下鷓  
鴒啼到綠陰邊詩人菴老吟何苦游子衣寒綻可憐回首  
東風千萬樹無情花柳漫依然

秋桑四首和芸臺夫子

桑落西風郭外稠枝頭誰復挂金鈎雞豚影散村陰寂砧  
杵聲寒社事秋豈藉烟花連杜曲任教霜葉采汀洲征人

未返羅敷老五馬重來爲爾愁

曾記桑陰綠過牆半年閒煞馬頭孃  
睇風葉剩并刀影覆露枝空野  
繭香春好也曾彈陌上夜闌猶自夢  
漁陽最憐賣盡新絲後却共天寒翠袖涼

更補幽風畫裡看分明村景見闌珊  
柴門客話夕陽落柘館人歸秋雨殘  
蟲冷車聲纒露寂鳥空梯影踏烟寒  
世間若有冰蠶種葉老霜前尙未乾

萬家衣被一春償自耐閒閒十畝涼  
繭種蝶魂迷古陌絲團蟲影挂斜陽  
鶯花郡宅誰供圃雞黍田家獨面場  
晚乞

卷一

五

使君桃李課也將餘蔭問江鄉

瑯嬛仙館餞季廉夫回揚州

六幅蒲帆挂曉天驪駒聞唱已當筵  
縱求美酒非千日難醉先生住一年  
螢苑綠楊秋憶月馬塍芳草晚吟烟  
誰人解竝觀潮作如此詩篇莫浪傳

錢可廬徵君水流雲在圖

桂兮小山蘭兮空谷有美一人香茅補屋  
竹四時節松萬年枝翳乎草木歲寒誰知  
維山出雲天高可飛維水出泉海深可歸  
終南何處捷徑窘步名山石室須之異



谿源隱廬

蒼翠橫遠目細轉崖邊路老屋寄烟叢冰石招閒步潭平  
青如空靜寫簷前樹片雲弄遠姿巖光與吞吐時時潭上  
飛白鳥同旦暮媚茲寂寞人心迹悅清素雙峯夜來雨已  
向雲溪注為語下山泉清濁慎所去

黎二樵詩冊為聞人

如珏題

珠江有明月流照鏡湖陰瑤席薦清夜玉琴彈素心夢魂  
猿雨斷書字雁霜沉為憶六君詠芙蓉潭水深

卷一

六

耿安亭家園畫冊

和風被園林生物怡然綠庭階蔭春餘時序闕心曲泉香  
芝菌蒸露潔蘭苔沐扶老竹憩牀弄嬰花滿褥寓目藹物  
情隨意暢天屬陟岵春未違循陔秋已肅嗟余渺千里白  
雲傷遐矚

方湛厓春隄試馬圖

江南歸思蝴蝶飛西湖曉夢空依依故園錦埒春芳菲此  
意欲傳知者稀張侯善畫心栩栩

張農聞

畫柳欲眠花欲語

小華山下晴光吐雪花細步來何許柳外垂虹春未消玉

馳宛轉隨輕颺白烟一道蹄痕遙紫燕黃鸝不能嬌青絲  
微控意態整驕嘶十里春風永軟紅蹀躞香塵靜花光散  
作連錢影長日踏春春無痕沈沈飛絮易黃昏一鞭搖曳  
詩人魂吟聲遠出花間村歸來繫馬溪邊道三月光風隨  
處好錯認舊遊成芳草男兒豈合故園老憶踏京華輓路  
塵春明桃杏臙肢勻銀鞍照影嬌青春花插瓊筵紅滿巾  
區區芳草門前路一日遨遊能幾步莫怨王孫留不住芳  
馨容易成遲暮何處玉洞飯胡麻約遊天台碧溪春曉千岩霞  
鶴書且赴劉晨家明年共踏青蓮花

卷一

七

江墨君麒麟研歌

蒼后造書炎靈愁軒之囿兮麟何遊素王絕筆姬運厄魯  
之郊兮麟何獲麟兮麟兮出無時祥不祥兮非吾知符瑞  
紛紛起東漢角端圖象碑稱冠摹洪氏隸續中漢麒麟畫石赤伏烟消

白水寒禎符盡逐爻精散麟兮有翼不能飛劫塵浩浩龜  
頭漫誰傳縮本出朱方鄱陽之洪勤研鑽自爲隸迹辨真  
源非爲圖形增浩嘆自古圖緯孽之萌真學相距冰與炭  
江君篆刻妙入神史籀成周斯相秦更張一軍工漢隸卽  
陽酸棗無其倫碑訪瑯琊碣摩岱手苔足蘚身荆榛掀烟



拓雨撫星宿如探山寶載輪困歸來忽作吳山客古物摩  
抄風雨夕生平技癢不能搔手落紫雲鑄一石嶄然頭角  
露崢嶸日月翼身星貫額背上兩字署麒麟鬣馬蹄牛皆  
辟易人謂江君文愛奇筆花夜結紅蕨蕤玉書吐瑞發光  
怪赤烟破匣騰琉璃滑稽又道如君寡漢廷執戟爲郎者  
歲星降作人中麟勒象詼諧實自寫不然案頭拓一瓊剖  
符卽墨先渭川收攬圖書功第一麒麟繪事高凌烟重此  
語君君不顧心獨好古他無寓蕉葉臆明影寫雲蓮花幕  
靜香研露腹磨空洞銷千麋頭掃淋漓禿萬兔瑯嬛主人

卷一

六

錫之銘摭拾羲娥入毫素提象配機審厥形

提象配機芸臺師銘用此

如金出冶神已鑄研經秘室多琳琅古愛今珍兩不如吟  
箋投滿藤花笈文心妙過雕龍勰若非盛時郊藪材錦楨  
敢詡連錢疊吟觚我輩何敢操詩符迫促軍中礮冷光澁  
研冰生鐵筆鋒椎鈍豈能豪請磨君研濡長毫乞靈圖象  
追風騷不然長空絕羈絡黃生赤手誰能縛

戲書樊川赤壁詩後

荆門一炬劃江東國色三臺掃薊中寄語北歸曹吉利兩  
家夫婿自英雄

入塞蛾眉爲故人橋公風義更無倫須知不是袁家婦省却兒曹賦洛神

張子白畫眉圖

粉閣新寒凍玉尖銀燈無語黛纖纖春山睡足春雲裏勾上橫波月卷簾

便面桃花畫一枝無端輕嬾被人知從今莫怪張京兆走馬章臺日更遲

月謠

天上一月地上一月天上月圓地上月闕少時一月老

卷一

九

時一月少時月慢老時月疾故鄉一月異鄉一月異鄉月分故鄉月合

讀曲歌

千金明月珠愛懽無與比願懽身上衣長時爲儂被木蘭桂枝槩相將蕩蓮池蓮子待懽喫毋采蓮花歸星斗光在戶更漏莫忘記非無沙糖酒愁懽十分醉滴滴檐頭雨到地無點移願儂作懽影寸步不相離春風奈何許儂懽不戀家一般楊柳樹飛作兩般花男兒一落地便欲東西走儂生是郎當閉著門兒守



權子口上心心口不相對何如儂襖襠當胸復當背  
權心如明月當面不相親門內照著儂門外照著人  
刻骨著相思本是儂心愛骰子擲盤中參差不成對  
切切復切切眼中啼見血衣裳短與長自有傍人說  
心腸眷復眷一隔成鄉縣兩目語雙眉爲何不相見  
蜜蜂釀著蜜胡爲在郎口麻紙疊兩層昔薄今非厚  
昔昔耳中語不記真匪真憐儂如鏡子啼笑只因人  
白白南山石移與人家去鳩兒食桑棗誰能保得汝  
古井一片冰冰消復是水潔白長分明無可爲郎語

卷一

三

宛轉銅壺漏宛轉一何苦新衣減舊裁省得羅幾許  
白玉忌塗泥容顏只如舜燈光入夜知日中不相信  
儂心隔著權憔悴無復理瓜兒落井中何時到得底

華清賜浴圖

華清曉漏滴紅玉水殿沈沈迴波曲銀屏暖日照芙蓉第  
一仙人春賜浴女官玉立侍霓裳三月溫湯百和香翩若  
驚鴻來洛水仙乎飛燕舞昭陽素羅似雪飄無有如此春  
寒那得受暈入肌膚玉樣紅瓊壺一滴凝酥酒豐姿綽約  
近闌干欲試瑤衣巧稱難殿前諸姊含香問簾外三郎帶

笑看鉛華洗盡真傾國除却瑤池逢不得三千粉黛一時  
低羞向晶盤照顏色無央歡樂春遲遲笑撒金錢看洗兒  
綠衣女子風流甚偷浴凝脂第二池露華夢醒鴛鴦語一  
字分明是山鬼香泉空自說真珠不浣棠梨花下土恩澤  
新承憶幾春淩波羅襪暗生塵長生夜半嬋娟影誰是銀  
河欲渡人仙山尋覓知何處珠箔徘徊情縷縷玉容還似  
出華清梨花一枝春帶雨

武林小姑冊子

女兒家住鳳凰山了角東風綠兩鬟應共麻姑擘麟脯不

卷一

三

將狡獪視人間

阿母春頭噩夢驚藍橋無信泣雲英綠牕鸚鵡偏多記學  
誦仁王秋月明

六幅山屏照研青拈毫妝閣對西泠卻憐學士閨中號注  
到金箱女孝經

明湖四角柳絲風繞檻芙蓉插鏡紅一捻銖衣牽不住前  
身應是李騰空

病夜

連江寒雨響松林鄉思迢迢入暮礎別鳥頻驚異枝夢啼



猿只起故山心未拋藥物支長枕半廢燈檠照薄衾莫怪  
西園易憔悴秋風多病復多吟

萬松書屋分題得李遠失鶴

空山清唳海風吹一夕山人賦索居雲閉曉籠空有影月  
生秋帳忽相思別來歲月還堪憶問到神仙總不知十畝  
野田芝朮老天壇何日賦歸期

沐鶴溪同主人

黃鶴何心羨遠遊沐溪深處有浮邱白雲一夜生新水明  
月三人共小舟上竹魚兒多比目澆紗仙子不知愁

縣志  
謝康

卷一

三

樂事是誰家住桃花岸說著郎回便轉頭

大郎回小  
郎回地名

男百祿百禮全校字

受業瑞安洪坤校刊

太鶴山人集

青田端木國瑚鶴田

詩卷二

東海有奇鳥篇

東海有奇鳥五色光相宣奮翼游紫氛來集崑侖崑侖  
有奇樹容采青冥間揚華朝日麗結實春星繁秋霜不待  
熟零落委邱樊邱樊多鷓雀飽啄飛翾翾奇鳥饑無粒亢  
頸鳴清暎一鳴驚羈鴟再鳴驚孤鴝三鳴紫烟結四鳴彤  
雲翻五鳴出世聽振翮辭崑侖冥棲夕丹穴清飲朝玉泉  
曠音遺風寂奇毛藏霞鮮豈不惜時世所懷良獨難來儀  
有期會徘徊千萬年

登元鶴樓

山城粉堞映谿光欄倚西風鬢欲蒼湖上棲霞逢落木樓霞

寺天邊排雁入斜陽排雁嶺美人千里暮雲濶鉄笛一聲秋

水長夜半樓頭叫元鶴月明無主自徜徉

郭公山尋王右軍富覽亭址

昔人遺我去烟草太紛紛古木夕陽下秋聲不可聞神仙  
知有命今昔感斯文誰復後來者大江流白雲



登江心孟樓

江樓試一望風葉亂蕭蕭白鳥沒何處青山相向遙孟公  
今不作高詠日無聊獨立寒濤上秋聲送暮橈

江心寺謁文信國祠

百戰飄零越海東烟塵滿目寄孤篷欲回天地波濤上只  
剩山河涕淚中渡雁有聲催朔雪扶釐無力墜秋風此心  
不逐狂瀾倒半壁猶懸氣似虹

一隅勢已失偏安馬角崎嶇歲月殘海外有天移北極塵  
中無地著南冠浮雲孤嶼隨潮變暮雨荒陵入夢寒千載  
斷雲碑可讀丹心長作昔時看

卷二

二

白沙嶺望海

山花扶行輿緩緩上雲壁高嶺疊更多海上銀沙積升顛  
遠勢來腳踏浮空石冥冥見帆影數鳥沒遙碧風雨儻而  
至對面隔數尺安知雲氣中不有蓬萊客春陰龍蛇游日  
暮鬼神宅恍惚迷端倪浩蕩窮潮汐非無黃鵠心臨風歎  
羽翮

曉發芙蓉村

進雁蕩  
路始此

飛翠失空山游夢兀然醒人語夜堂深簾白燈猶炯寒暖

戒衣裳共取芙蓉徑綠樹脫蒼烟遠媚溪光靜鳩啼雨後  
聲山認雲邊影村引碧陰高壑度香風永雁峯落何處四  
十九盤嶺

斤竹澗

巖幽猿始啼天光發林晏早涉芙蓉溪憩此斤竹澗白雲  
翳喬柯青烟裊修棧苔明沙汭交石麗淙流間露壁灑松  
清風潭落花眩蹊惑漁者重迹懾樵人慣攀翻恣築筲凌  
厲厭葭亂菖蒲養谷神薜蘿耻塵宦遊山昔何人越嶺此  
流眄枉挈崖上屐未眺湖中雁仙事昧交臂靈山邈對面  
昔艱今在茲窮賞寄余優泉聲引天高石色到海幻元中  
無物存意外非人辨寄言進帆客孤嶼焉足戀

丹芳嶺

青冥叠晴嶂盤磴四十九詭異闕天關獨當羣峯首螺旋  
海氣孤雁落天光黜千松遞明晦一石轉前後觸衣雲霧  
虛扣壁莓苔厚垂條助振策飛花點行綬崖鹿儻可騎洞  
猿忽相友意勝遂忘疲勢拔不知陡迴俗閉妄轍蘊賞藏  
直藪山靈定我夸天巧轉人誘披頂豁大觀偉此造物手

能仁寺



靈谷鉢盂大中藏金仙景巖構發自然蒼翠拔幽迴山花  
纓絡相水石光明頂寺前千佛峯一峯一佛影下有白眉  
僧禮佛日常暝衣履蒼苔深烟火白雲冷空音叫幽禽清  
香生苦茗因緣境俱寂尋翫迹惟靜過午水聲麤雨滌山  
容醒

馬鞍嶺

磴道苦紆迴突兀復此嶺行色滯行旌峭絕無由騁梯空  
踏斷壁踵觸後人頂斗上忽垂下勢不憩一頃懸路失欹  
扶足到目先警高風落厓壑鳥墜空無影危步較分寸餘  
力借榛梗有奇不暇賞出險卽云幸山林且崎嶇投迹能  
無省

卷二

四

常雲峯

對嶺天在山白雲滿晴日漏出雲影中青蒼插峯足峯足  
倏復冥天首芙蓉矗東峯雲是松西峯雲是瀑雲天一東  
西互見峯峯綠卷之仙人衣孤映宵白鵠儻忽海帆張蓬  
蓬漲虛壑雲態何變幻靈峯爲舒縮宕雲七十峯藏之一  
峯腹其下海穴蟠龍氣各相屬每當大火交一縷噓萬族  
無雷潭響奔不雨林光沐明晦勢多端雷雨亦翻覆猿鳥

磨有聲各不辨崖谷長看雲斷邊僧寮白烟續看雲是看  
峯何在循其麓我看此峯雲隔嶺妙相矚試坐馬鞍頂快  
覽過朝旭

連雲障至龍湫

鳥道下蒼迴峯路始一宕披蘿窺龍湫幻壁更萬狀洶湧  
跨連雲疊此橫天障谷景肆重沓厓象森開張霧露晡陽  
門雷霆閎陰仗雲盡龍潭出天大日色旺卻立蒼石根瀑  
水猛相蕩旋颺激長林灑壁皆雪浪冥花落空際虹影散  
石上連猿叫無聲飛湍遶千嶂當畫萬物孤倚策一身曠

卷二

五

徑隴返至虛窳寮觀大壯役心移海圖眩目出天匠慎勿  
語井蛙吁茲造物妄

大龍湫觀瀑

天帝治水鞭神龍神戲水漂鴻濛帝怒轟擊驅靈僊九  
淵逃入靈湫宮靈湫幽閎神所鍾柱天鐵障圍穹窿冥戈  
陰劍森重重稊猢前舞蛟螭從雷霆搜擊伎倆窮翻與回  
怒和雌雄盜帝天符叱雨工擊戲海水如驚鴻玉峯作杵  
銀河春怒椎河鼓金天聾天孫機絲月朦朧如烟五色舒  
長風星斗連珠懸玉竦帝藏下輸天錢空龍王嫁女東海



童水晶環珮玲瓏玉塵竊窈珠簾樞珊瑚寶日金芙蓉  
大會百戲颺華幢嶽瀆神怪馳蒙茸海馬銀鬣犀鐵鬃火  
睛赤豹金毛狨舍利跳躍霧喁喁都盧上下雲幢撞神弩  
羽箭飛蟻蠓仙檣帆幅隨潮東何來金石聲琤琮竊帝天  
樂謹羣蒙洛水浮磬豐山鐘峴晤神鐵軒轅銅忽作武樂  
勢衝幢黃帝涿野塵神功蚩尤敗陣兵洶洶頭裂天柱崩  
蒼穹忽又雅樂聲唯唯天清王母觴空峒青鸞吹簫氣青  
葱白虎擊鼓神雍容玉女偷聽丰姿稜剪刀擲下化雙峯  
忽然霹靂摧從龍日月顛倒迷春冬閻王縮鼻氣懣懣

山有

卷二

六

關王鼻 山鬼垂涕潛烟叢神僧咒鉢窺其中咄咄怪物難與  
逢神河落天無始終靈湫迴與星源同造化不死長如虹

剪刀峯

天光忽裂媧皇石燕尾青金一千尺飛雲片片過風吹剪  
碎秋羅滿天碧雁湖七十翠芙蓉手爪空靈誰擘畫神椎  
鬼斧太粗頑瘦著鉸刀向空擲開來不欲付操蛇依然玉  
女清潭側卻觀斜睨狀參差誤彼青鸞有雙翼神人五嶽  
守真形渾沌眉目非生成山川巧匠有如此天孫機錦愁  
文章流黃斷却餉何處世間無有嚴君平

梅雨巖

林景春霏霏天晴巖花吐溪客衣裳斑忽濕黃梅雨曠無  
林表陰滴瀝在巖戶細瀑出萬杉灑落蒼石古石橫簸當  
空層層漾冰縷素沫四壑吹青漪一潭聚雲過翳有聲風  
轉瞥無處晞髮負暄厓藉苔憩涼宇面前含珠峯金碧淨  
沙土日光松淒清飲石見樵苕但少桑芋翁摘茗澗中煮  
洗滌龍湫腥巖香聞蘭杜

靈巖

五嶽在天地物大無與難雁蕩有靈岩竒敵五嶽半雲海

卷二

七

百二峯竇抱勢浩渺其中四維分又若兩儀判結構盤古  
初拔立扶桑畔萬竅地肺張一脉天河貫石上生日月林  
下變昏旦岩狀肆森凝壁象儼昭燦比谷蜂房深聯峯虎  
落暗老蜃百市陳神獸一門扞山客奧獨尋怪迹喜深探  
展旗蚩尤軍擘海烟霞斷卓筆倉頡書列天星斗冠斬鼇  
天柱蒼削蚌海珠紺仙骨屏風行僧飯鉢孟散驪龍雪竇  
眠蟾蜍月宮玩臨潭更窈窕玉女起清盥濯澗又婆娑金  
鸞弄柔翰 展旗卓筆天柱海珠屏風鉢孟玉女青鸞及捲圖龍泉水皆靈岩勝迹 竹杖探未  
周桃核積難算出沒幻真形登降豁竒觀縮地出海藏攀



天列雲漢洞重烟葛迷谿沓風篁亂佛夜自然燈僧夏未  
嘗汗山中木葉仙世外乾坤換微生畢婚嫁獨往期汗漫  
心涼太古冰物熾陰陽炭相從造化遊不作人代歎谷多  
不死藥峯有長年館誰從面壁居獨結負苓伴三花嵩頂  
朝五葉廬峯宴靈巖入覽迴宇內盡一旦開山諾巨那鑿  
石置今讚

龍鼻水

靈巖落天無五嶽徙海龍宮藏一壑捫蘿褰瀑窺層嵌古  
洞森寒踏霜鏜破空一嘯風雨來幽林颯颯冥花落神龍

卷二

八

倒螯蒼岩中雲氣化石石氣惡鼻頭挂空捫有聲五月寒  
涎一丈綠叱起霹靂碎岩飛電身直怕驚濤作踐踞滿壁  
鱗爪痕紫蔓蒼藤盡蟠薄龍精飛伏鼻有神鼻水三時看  
羸縮天瓢盛夏不濡脣佛窟隆冬可洗目鼻水自九月下  
旬起至五月下  
句止其候有常乃六月上旬大雨時行龍精出洞而鼻水乾也龍兮鼻兮竅忽通六根大  
地虛空鑿盱眙老僧獨木龕龜息其下神漠漠我生怪膽  
森光芒一觸百日神魂愕閻王捉鼻向青天不值老龍一  
長喙

捲圖峯觀朱子磨崖書

天開圖  
畫四字

青天出圖畫橫展隨風揚靈秘不可盡倒捲朱霞長苔石  
洗萬古文隱天蒼蒼神授紫陽翁石書崖之旁渾沌一書  
後露此直文章當年河洛啟龜龍文字祥奎勾秘一泄雨  
粟天蒼涼書契日造作知巧日孳張名字墮城郭記牒  
戈折山川與草木怪異自妖傷怪下拯無術仁義指  
萬物返無物谿谷道荒唐猶龍一汨沒祖龍垂彼猖不有  
魯中叟三古無羲皇圖書闡天地日月重光芒江河峙底  
柱麟筆爲之防長垂百季末紫陽傳芬芳大義再昭揭異  
術揚糝糠一枝六經筆岩岩飛烟霜文字本天奧大者規

卷二

九

元黃間世一授受帝王不得將常時淪川嶽細者充文房  
奇章及寶繪亦發乾坤藏其多厚蓄積鬱爲峯低昂星虹  
忽怪露靈迹披天閭此圖列宇宙幻出東南荒懸知大荒  
外積氣隨天光橫目雖末生圖書潛微茫萬載同河洛歸  
我有道王安得吾儒筆書之于扶桑撫此磨崖書青雲卷

山峒

靈巖寺

海上旃檀窟翻經諾巨那摠衣升座少停策看山多講罷  
參無虎岩虛秘有魔瀑泉飛不到聲在萬松蘿



春山行屐碎午寺打鐘殘苔地松雲活茶天穀雨乾鶯啼  
齋閣聽龍挂浴堂看一悟風幡義心期嘆浩漫

安禪谷

冥龕任空相靈溪萬緣謝木葉發天光孤雲在岩罅結趺  
昔何年片石莓苔藉龍叔付茫茫山中一涼夏木魚寂無  
聲日落猿參罷冷泠松谷泉一醒人間夜

鐵城障靈峯寺

陰陽鐵鑄紅葳蕤赤圍角立千熊羆神仙寶訣秘重穴鬼  
物呵護誰能窺禽滅無蹤援失步劫塵化盡空中樹巉巖

卷二

十

石骨瘦無膚飛雲欲著還驚去老僧卓錫倚崔巍定力能  
住窮岩積風雨怒生挂衣壁日月倒銜散花臺石根蟠地  
潛精聚拔起蒼龍無尺土天陰萬竅吐青烟火光夜炯神  
靈語高空中接仙人庭神梯無級門無扇安得巨靈擘山  
掌劈開玉檢搜雷霆

石梁洞

仙人下聽瓊臺樂手擲晴虹千丈落秋風碧海起鼉鼉夜  
月清天降烏鵲空明玉洞彩梁間旁垂一徑鬼靈鑿高步  
危同飛鶴爭孤身捷與驚猿搏幽崖腹孕金仙宮色相玲

瓏絕雕琢堂心玉竇滴醜醜洞口香條結珠珞咒壁能教  
日月生叱空直看雷霆作神僧枯坐石蒲團雪色鬢眉皓  
如纒磬聲高裂碧天飛下視青烟空漠漠藍橋何處問天  
台欲借晴蛻弄綽約回眺靈扉紫翠重白雲爲鎖風爲鑰

小龍湫

青天壺之中玉潭鏡而空林花山葉千萬重其內乃有戲  
珠龍直珠何瓏瓏翦水不可窮不肯百斛十斛用之如塵  
愁天公但見一絲一絲曳之百尺皓潔而冥濛春冰不成  
片片挂不成虹忽看銀竹收白雨又狀玉蘿懸青松白龍  
抽髯長拂隨風掩映金屏風天老談天落咳唾霏霏素  
屑玻璃宮道人煮石茗颺烟縈春叢細聽杉篁寫壁響乃  
在竹壚之餅翠濤素沫聲瀧瀧聲瀧瀧無西東莓苔坐石  
斜陽紅一杯團團小龍月何如大龍湫上一日目明三日  
耳聾

水簾谷

白雲卷山衣雨過水精域青水挂作簾灑此空冥色谷景  
晨霏霏森寒行不得石牀潛清虛玉貌無人識風吹蕙帶  
斜月映松蘿直天光萬古垂池面花如拭山香不斷聞水



樂鏘時刻海鶴引霜沉洞嵐拂烟翼洗然塵外期勞我山中  
憶落葉有冬春飄飄此何極

聽詩叟

聲詩日無際五色萬物會一物生一詩一詩一天籟山海  
相于喁不在風騷輩凡人鑿天真肝腎弄狡獪撲地蒼蠅  
聲何能出塵盍曠哉莓苔叟側耳青天外兀來元氣初俯  
聽乾坤大

靈峯洞

松濤吹天青濛濛佛螺上出莓苔峯琅琅木魚響空濶聽

卷二

三

之乃在莓苔之腹蒼然石氣穹窿中金潭光射空照膽寒  
青銅洗濯五藏灑毛髮然後遠隨木魚之聲一曲一曲梯  
霞路蘚窺穹窿其內乃有空王宮世界誰造作玻璃不可  
鑿驚從白地登高怕青天落藤輪日月走龍蛇蓮窟風雷  
出鵬鶚應真真非真五百同一身人間萬古夜海上千年  
春鉢者鉢巾者巾若箇文殊與普賢若箇無着與天親吾  
生記得愛此果衣邊繫有牟尼日照光璘瑠生天吾何因  
睡著一箇無有貪與瞋津梁旣疲後成佛此子能有濟世  
心洞中僧老樹精百衲袈裟木葉厚山花還被珞與瓔堂

心珍珠滴復滴口飲香泉當飯喫洗心洗耳又洗髓一日  
井上長如此我來寂坐僧不言知我一心杳在石上之清  
嗽蘿上之孤烟悄然叫鶴而啼猿木魚一放手人間白日  
窅窅不得聞聲知其源我來何因緣作禮下山去贈我紅  
蘭一瓦盆虛空大踏步本是來時路來時萬松花開滿無  
人處木魚回首半青天更聽松風天上去

蓼花嶂

茶花白湔湔鶻花紅斑斑松聲石壁行其間當前忽欲無  
青山流水涼且閒恍然行到江南紅蓼灣看之又似巖陵

卷二

七

江上鷓鴣灘條條沙上雨簇簇波中烟一幅倒挂秋光幃  
霏霏漠漠遠帶雁湖十頃玻璃天山靈定畫工寫此真可  
憐令我心落沙汀際持竿却泊釣魚船白雲一點鮮便如  
鷺鷥皎皎飛長川不知身轉萬峯裏芒鞋跂石聞巖蟬廬  
山一花一葉或如此吾將奈之山中老衲此義然不然

淨名寺

十八精藍寫雁形蓼花一幃書冥冥水光獨冷青苔寺雲  
氣初香紫石屏谷靜足音生草屐堂空禪味注茶餅名言  
都向圓蒲盡畧有風蟬送客聽



石窟雲門見亦希  
弄泉席蘚坐暉暉  
松厨粥色長清淨  
竹道經聲半翠微  
澗月定尋九節杖  
山雲時補六條衣  
遊仙妙得空明法  
不向金庭問是非

老僧巖

眉毛雪霜白衣被  
苔蘚青虎作大弟子  
烏度名王經溪聲  
不斷廣長舌了義  
入山君且聽

僧拜石

一僧偏袒著風雨  
向石囉囉作梵語  
當年見石佛隱身  
投體空山獨勤苦  
憐渠佛子說無生  
夜半傳衣幾鬥爭  
何時

卷二

古

石爛虛空碎一笑  
僧伽撒手行

寄雁湖

我行雁蕩山不見  
雁湖頂聞說龍湫  
西復西夕陽重隔雲  
中嶺峯頭石盤盃  
濶絕波十頃上爲布  
水源下是無人境  
胡雁萬里來高泊  
青天影玉菰自然香  
飽宿雲沙靜孤光  
軒白波瞥下天風  
猛人問總不知石上  
秋蘆冷仙帆何處  
訪仙都中有墮陽  
彭蠡湖雁王亦憶  
天邊侶爲我蓬池一

寄書

來斯灘

蒼莽爲牛鑿鑿爲羊牛  
來斯灘日曠而曠四句相傳爲神語

蒼蒼者牛鑿鑿羊彼何來斯春草長仙人放牧青山裡日  
向金沙飲灘水千年亂石臥莓苔不是仙人鞭不起黃初  
平八金華山李伯陽出函谷關林中橫笛無人識鷓鴣  
鵲水面閒

石門潭

連嶂閣東南合沓萬峯勢垂盡蒼石門豁出青天際百泉  
會灑落石澗相陵厲金潭射瀑流銀礫翻沙滙天光澹孤  
澄壁影動羣翳亂猿飲更接寡鶴浴還唳山藥懸溜澆畦  
稻分渠藝樵舍識希微漁舟想迢遞相望潮汐池過眼成  
遊逝愛此潭上清千盤出松桂臨行重盥漱結我靈山契

卷二

五

雁蕩山茶歌

蒼龍石上松看筋不看鱗甲麤黃鍾石上桐采心不采皮  
膚腴山中說茶亦如此靈異石上仙人株脂柯肉葉何爲  
乎雁蕩之峯百峯石青青石髓流岩液神僧種子閱千年  
石罅靈根纔一尺山茶得氣最清高松頂天風沸翠濤蒼  
壁莓苔垂鶴爪元崖霜霰落鷹毛飛泉日夜澆山骨金碧  
沙痕淨龍窟一枝摘出水聲中白紙封瓶雲不歇老僧夜  
起煮山泉石乳清和冷月圓餉客一杯冰入腹碧天無睡



雨花寒人間飲事爭矜寵白裹黃封壓重重漚向朱門漚  
醅前茶家奴僕無靈種茶乎茶乎世上相知只數公江南  
無過桑苧翁洛陽只有一廬全奈何不到雁蕩裏都籃破  
屋憐松風茶兮潛精自愛惜不是仙緣不教摘獨有高禪  
諾巨那巖中宴坐常時喫我爲茶兮作此歌山靈笑我太  
驚誇清冷尙是塵中味何不見雁王頂上開白花此乃是  
青虛不壞黃金芽

雁蕩山題壁

五峯山下好村居海上羅浮兩不如斤竹澗寒生箸米美

卷二

六

茗溪暖種香魚禪僧履雪春行道仙容樵雲夜讀書愛昔

詩髯山色裏開門啼鳥日相於

詩人李孝先  
住五峯山下

雁峯靈幻狀難真圖畫青天妙入神布水洒心香菌菖寶  
山撒手氣金銀萬松雲霧皆龍跡千石莓苔總佛身爲問

諾師初得地耆閣相度幾由旬

招提積翠渺千盤不似人間道路看祖院香燈僧示偈禪  
堂花木客忘餐淨瓶六月水簾谷雲版一聲山樂官始信  
養生皆外道清涼何待問還丹

山中猿鳥使人憐萬種聲音樹葉前東閣松連西閣雨上

方花落下方泉謝公嶺畔青苔路阮客溪頭碧落天重聽  
潺湲石門瀨圖經愁寫爲雲烟

天台道中望赤城作

巾子峯頭朝霞頰桐栢光景仙人迎蒼龍煉精見大火羽  
節羣赤來太清飄然神路忽相接乃在天台清平洞天之  
霞城日拂紫巾出不攜朱藤行衣濺白溪雨鳥躡黃岩星  
昔年丹竈日坐此滿山藥草金光五色或鱗或鳳長縱橫  
金潭照鏡府藏靜石室繡書帷瞳明丹砂燒萬丈赤石標  
千層結有綠蘿窈窕蒼飛庭朱明坐閱八千歲還如我青

卷二

七

童之貌朝霞玉頰初生齡今日更何日

是日值  
生辰

生天天有

情遊仙人間一春夢白日短如風前檠桃花酒熟仙雞鳴  
石上天樽浮空青玉斝洗爲天姥壽此能見我長孩嬰桃  
源仙子老不出胡麻過眼成塵羹司馬悔山悔不了挂世  
安用雲烟名瓊臺爲我懸海月臥看日華東方生明朝高  
踏華頂去手弄芙蓉朝玉京朝玉京吹玉笙仙人拍手梯  
霞上日醉天壇歌太平

國清寺

五峯轉月兩溪環天上銀河第幾灣千歲松光開淨地六



朝雲影見寒山飢花猿臥香臺靜搗藥禽棲玉樹閒此路  
靈霄眞髣髴不成仙佛不須還

登華頂憩僧茅篷

蓮花千朶破雲飛峯頭乃爲天壓低我尋仙路未及到日  
午已鳴空中雞天風駕雲疾于鷺瑤草春香振岩谷吹盡  
紅塵體骨輕綠蘿被我神仙服高披闔闔臨層溟雲如海  
水山如萍鑪峯噴日烟光赤千霞一氣凌紫庭扶桑仙樵  
挹天酒神仙蓬萊呼可鷹乾坤如此亦大小雷公何勿嬰  
兒聲下方晴翠浮空濕影落茅檐低覆笠花氣深深霧欲  
冥不知初徑何從入采藥行余自在禪蒲團且借僧牕眠  
香茗浮甌點素雪黃精八竈炊紫烟生願作仙不作佛鸞  
鶴清霄望髮髯仙臺只在月明中香林欲暮能留不

石梁瀑布

我生看山嗜竒逸石愛橫空水直立夢遊五嶽誰見諸突  
兀天台眼中出天台四萬八千丈此水源頭石上長萬山  
走東石走西山盤石轉皆天梯洞天劃開雷斧作削立芙  
蓉壁面却千珠萬玉滙成河卷向灣頭挂空落半空勢折  
排長風一落再落光氣雄天關畏傾軸愁斷橫以鉄脊蒼

飛龍龍身架梁黑是石背負莓苔三百尺噴霆激電跨中  
間上戲天吳下海若到此尋源直是天星津叠浪機絲烟  
世上橫流原不到懸河欲渡愁天船空山說法無可說笑  
爾神通廣長舌曇花亭小水花麤滿壁松青夏飛雪吾家  
瀑布石門山霏微鸞鶴長清閒龍湫瀑布怒不決龍死湫  
中氣始歇天台瀑布東南三鯨人泉客恣窮探匡廬康谷  
我未到太華泉簾有人告比似天台多少強藍橋未度莫  
能詳海門白雨銀濤立上挂晴虹鸞又長此是石梁飛瀑  
畫憑君眺首一思量

卷二

九

宿石梁方廣寺夜雨

華頂袖來雲一朵擲向懸崖深不鎖夜半驚起蝙蝠飛

夜遊

石梁下見蝙蝠大如箕

黑雲壓斷蒼藤枝石梁擎空作龍立怒勢噴

薄光珠璣一雨空山積涼翠蒼茫誰解神靈意滑洗莓苔

十丈秋芒鞋恐踏鱗髯碎佛龕燈靜光流螢銅塔夜語風

中鈴蘿月藏烟碧悄悄岩花落霰寒冥冥游仙人在經壇

宿一夜風泉響寒玉香林漠漠露華流屐齒朝來潤如沐

曇花亭外嵐光堆石梁疑失蒼山隈瀑聲瀉瀉濺岩壑長

虹仍挂空中雷



雨中發石梁憩萬年寺

連壑走鳴鼉飛泉轉輕轂一徑滑蒼苔濛濛傍巖曲積雨  
搖空林冷翠落疎瀑人影石蘿中縹緲衣帶絲白雲身上  
流攢之忽盈掬香藹不知遙僧寮露林麓朱藤倚萬年作  
杖堅可握沙羅浮輕陰辛夷泣殘馥八峯寫遠青佛頭淨  
如沐愛爾山中人

僧曉雲

烟霞媚幽獨

雨霽發萬年寺路望天姥峯達清涼寺

踈雨歇空林山意颯然醒石路逼溪光翠濕衣裳冷平巒  
疊遠波浩浩綠千頃崖雲盪晝陰海霧走風影明滅眺烟  
鬢遠碧空無頂道是天姥峯高霞失諸嶺飄渺懷李白仙  
夢一何迴石磬忽一聲路入香巖境

天台藤杖歌

仙人手種蒼龍根上蔭金景下瓊源鍊雲作膚石作骨瘦  
于鐵樹春無痕蟄雷震起蒼皮蛻力拔空山裂岩翠勢欲  
蜿蜒拂袖飛修髯一擲烟霞碎珊瑚瘦出蛟人宮一枝影  
縮晴天虹松苓劇雨寒瑟瑟蓮花倚翠香濛濛此物人間  
竟何有天種靈種壽人壽榆柳能回若木春尋常豈落塵  
埃手我待仙人叩玉扉仙人贈我瑯玕枝琪花瑤草看雕

落靈光獨闋娥與羲白日持此搜靈窟真宰若聞驚咄咄  
仙液深探玉柱雲寶華碎擊瓊臺月我家白鶴不須招嬉  
風浴景浮清霄玉骨珊珊自輕舉攜此母乃徒煩勞收拾  
烟霞歸杖底持壽高堂顏色喜不辭清夢到天台萬八仙  
梯平似几

金庭山

金庭昔夢寐溪影靚青岑欲買沃洲隱長爲天姥吟仙苔  
生木屐香路入松林稅我芝田駕飄飄世外心

苧蘿泊月和張子白

卷二

三

苧蘿山色好遙夜此停舟月洗涼波淨芙蓉一鏡秋浣紗  
人去後烟草至今愁欲倚西風醉清光入夢流

送廉使秦小岷先生入覲

霜臺望重舊清華延攬文章萃百家浙水人才寒士庶甌

江官績老民誇

觀崇溫處時除溫州莊長久病民者

松看鶴勢雲千仞

曾贈白鶴

歌有來集萬松岡千仞看翱翔語

柏戀烏聲月一衙欲借寇公留未得行

輿重見萬人遮

棠陰一路拜芳塵初日博桑照紫宸兩袖朝天清百屬三  
年報獄活千人星辰舊接銀垣曉雨露新攜玉陛春留得



西湖好吟社白衣開閣待平津

桃花畫卷

瞥見紅霞一樹新天台曾記踏仙塵胡麻飯後花長在閒  
煞春風洞裏人

錢江晚行

海角孤雲白澄空萬頃波江聲迴夜月帆影上秋河岸出  
魚龍伏船鳴雁鷺過明朝看山色知是富春多

釣臺

物色世悠悠江空水自流人間一釣石高臥憶羊裘灘雪

卷二

三

鷓鴣晒巖花麋鹿遊西臺竹如意聲斷爲誰愁

巖灘贈小舟子

蝶子瓜皮小僧人上水難沙犬收纜疾石縫寄篙安解醉  
長攜榼忘機亦把竿蘆花吹滿港雪夜不知寒

九日登混元峯

百盤松磴躡莓苔雲物高寒九日開嶺下曉光千樹合巖  
前秋色萬峯來洞扉影細芝長老野徑香新菊正胎翻憶  
天涯當此日一尊風雨首重回

秋林覓句圖

西風掃巖扃林表葉已脫天光迴而清石貌峻以潔重陰  
踈草根微陽澹木末山人耽冥搜崖徑悅清豁空烟聳瘦  
肩孤霜耿踈髮山禽暝欲棲幽弄間一發窅然如所思遺  
迹在岩穴含睇旣連絃申辭重恍冥心結虛籟澄思佇  
涼月時時卽栗聲儵然出林樾

青田上灘謠

老鼠梯前大小洋溪中黃狗尾巴長莫言百尺牽來短一  
寸愁如一寸腸

小羣灘上大羣灘多少長年縮手看飯甌巖高那得上算

卷二

三

來都比白沙難

金水溪頭溪雨多蠟溪溪口浪生花石帆丐與行人便半  
日東風到下河

橫竹肩頭挽巨舟佛頭巖下迴生愁行人眼淚聲聲落似  
聽哀猿到峽州

男百祿百禮全校字

受業瑞安洪坤校刊



67  
400

3



25-26